

Communicaziun a las medias dals 28 da fanadur 2022
(Communicaziun ad hoc tenor l'art. 53 dal reglament da quotaziun)

La BCG cun in grond augment en la fatschenta d'emprests e d'investiziuns

La Banca Chantunala Grischuna (BCG) ha registrà in resultat semestril 2022 legraivel. Il volumen da fatschenta acquiri ha surpassà il bun resultat da l'onn precedent. Sco spetgà è il gudogn sin fundament da las correcturas als martgads da chapital pli bass che quel da la perioda da l'onn precedent. La BCG sa participescha a la firma novfundada Avalur AG che creescha ina rait economica per interpresas en il Grischun. En in'emprima fasa sa concentrescha la purschida da servetschs sin ina cussegliaziun cumplessiva da ristga e d'assicuranzas.

Las cifras distinctivas:

- gudogn dal concern: CHF 103.4 miu. / -7.7%
- resultat da fatschenta: CHF 105.8 miu. / -16.8%
- afflussiun da novs daners: CHF + 1'418.7 miu. / +3.3%
- emprests a clientas e clients: CHF +539.3 miu. / +2.5%
- relaziun da custs e d'entradas I: 47.7%
- relaziun da custs e d'entradas II (incl. amortisaziuns): 50.6%

Il volumen da fatschenta è creschì fermamain

La BCG crescha vinavant considerablamain e registrescha in augment dal volumen da fatschenta da CHF 2.0 mia. Quai correspunda ad ina creschientscha netta impressiunanta da 3.1 pertschient. Uschia cuntanscha la BCG en l'entir concern in volumen da fatschenta da CHF 62.4 mia.

Per la fatschenta d'investiziuns han ins pudì registrar ina gronda afflussiun da novs daners en il volumen ordaifer la bilantscha da CHF 1.2 mia. (+4.8%). «Questa afflussiun da novs daners legraivla è reussida a nus en in ambient fitg pretensius. Quai cumprova ina giada dapli nossa cumpetenza en la fatschenta d'investiziuns», constatescha Peter Fanconi, il president da la banca. «Tant en nossa chasa principala sco era via nossas participaziuns.»

La facultad da clientella preschentada è sa reducida pervia da la performanza negativa al martgà per 4.4 pertschient sin CHF 40.5 mia. ed ils assets under management (facultad da la clientella plus agens fonds) sin CHF 45.2 mia. (-4.9%).

Er il volumen d'emprests a clientas e clients ha la BCG pudì engrondir per CHF 539.3 miu. ubain 2.5 pertschient. Ils emprests ipotecars èn medemamain creschids levamain per 1.3 pertschient sin CHF 19.0 mia.

Investì en l'avegnir

Las investiziuns dad oz influenzeschan decisivamain la fatschenta da damaun, perquai investescha la BCG cuntinuadamain en il svilup ulteriur da ses champs da fatschenta. «Nus avain ina gronda forza innovativa en nossa interpresa. Quai è ina basa eccellente per investiziuns intenziunadas en l'avegnir»,

di Daniel Fust, il CEO da la BCG. Consequentamain èn las expensas da fatschenta s'augmentadas en cumparegliaziun cun la perioda da l'onn precedent per 6.7 miu (+ 6.9%) sin CHF 104.1 miu. incl. l'indemnisaziun da la garanzia statale. Cun ina relaziun da custs e d'entradas II (incl. amortisaziuns) da 50.6% (+5.6 puncts procentuals) è la BCG vinavant ina da las bancas las pli productivas da la Svizra. Malgrà in lev augment è la relaziun da custs e d'entradas II restada cleramain sut la valur maximala strategica da 55 pertschient.

«Nus investin en ils affars da banca da damaun, na perdain dentant betg ord ils egls ni ils custs ni il rinforzament da la resilienza da la banca», declera il CEO Daniel Fust. La BCG ha paraculps extraordinaris en furma d'agen chapital (CHF 2'763 miu. / CET-1: 19.5%) e rectificaziuns da la valur / remessas en l'atezza da CHF 300.3. miu. Las remessas ha la banca danovamain uzà per CHF 29.0 miu. l'emprim mez onn.

In resultat da fatschenta pli bass che quel da la perioda da l'onn precedent

Sco spetgà è il resultat da fatschenta (CHF 105.8 miu. / -16.8%) sa reduci en cumparegliaziun cun la perioda da l'onn precedent excepziunala. Las correcturas da las valurs als martgads da chapital han laschà fastiz tar il retgav. Il gudogn dal concern è sa sbassà sin CHF 103.4 miu., quai che correspunda ad in minus da 7.7 pertschient. Il gudogn per scrit da participaziun è sa reduci per 11.1 pertschient en cumparegliaziun cun la perioda da l'onn precedent e munta a CHF 39.60.

Retgav da fatschenta: ils martgads d'acziun han impedi in augment dal retgav

Onuraris da success mancants ed adattaziuns da las valurs da las vaglias en l'agen effectiv han gè per consequenza ch'il retgav è sa sminui per CHF -12.3 miu. u -5.3 pertschient. Las valurs da la fatschenta da tschains, dals retgavs da vaglias dependents dal volumen sco era dals retgavs da la fatschenta commerciala èn pli autas che quellas da la perioda da l'onn precedent. En vista a quels svilups sa reducescha la quota da la fatschenta indifferenta sin 39.0 pertschient (perioda da l'onn precedent: 43.6%).

Participaziuns strategicas: l'amplificaziun sistemica avanza

L'onn da gestiun 2022 po la Banca Chantunala Grischuna far avanzar la diversificaziun dals retgavs aspirada cun agid da duas novas participaziuns. La structura da participaziun cun l'Albin Kistler AG (51%) e la banca privata Bellerive AG (55%) vegn amplifitgada en il decurs da l'onn cun ina participaziun a la Twelve Capital AG ed a la BZ Bank AG. La Twelve Capital AG ha per l'emprima giada influenzà il resultat dal concern sco participaziun minoritara (27,9%). La participaziun da 70 pertschient a la BZ Bank AG è vegnida acquistada ils 7 da fanadur 2022, uschia ch'il resultat dal concern resguarda la banca privata a partir dal 1. da fanadur 2022.

In sguard en il 2022: gudogn dal concern da 195 milliuns francs

La banca conferma la perspectiva finanziaria per il 2022. I vegn spetgà in gudogn dal concern da var CHF 195 milliuns ed in gudogn per scrit da participaziun da circa CHF 74.00. La prognosa resguarda in lev restabiliment dals martgads d'acziun ed ulteriurs pass da la Banca naziunala svizra en connex cun ils tschains.

Avalur AG: investiziuns en ina rait economica per interpresas

La BCG sco banca predominanta en la fatschenta d'interpresas pitschnas e mesaunas s'engascha per crear ina rait economica cun servetschs per questa gruppa da clientella. La purschida resulta d'ina collavuraziun cun partenaris strategics da differentas branschas. Sco organisatura da questa rait sa preschenta l'interpresa novfundada Avalur AG. En in'emprima fasa sa concentrescha la purschida da servetschs sin la cussegliaziun da ristga e d'assicuranzas. En l'ulteriur svilup da la rait, resp. da l'ecosistem suondan purschidas p.ex. en il sector da servetschs da fatschentas giuridicas e fiduziaras. Las interpresas ch'èn clientas da l'ecosistem pon uschia sa concentrar sin lur cumpetenzas-clav. La

BCG fa part da l'Avalur AG cun ina participaziun minoritara. La responsabladad strategica per il svilup da l'Avalur AG surpiglia Beat Blaser. El ha passa 30 onns experientscha en la fatschenta d'assicuranzas e sco broker e cusseglader d'interpresas. Plinavant è el stà parsura da la direcziun e president dal cussegl d'administraziun da Swissbroke a Cuira.

Contact:

Thomas Müller, thom.mueller@gkb.ch, telefon +41 81 256 83 11

Daniel Daester, daniel.daester@gkb.ch, telefon +41 81 256 88 01

Banca Chantunala Grischuna, Medias & Investor Relations, chascha postala, 7001 Cuira

medien@gkb.ch / gkb.ch/medien

Banca Chantunala Grischuna.

La Banca Chantunala Grischuna porscha tut quai ch'i' dovra per ina banca universala moderna – per persunas privatas, l'economia ed il maun public. L'interpresa cun sedia principala a Cuira è represchentada en passa 40 lieus en il Grischun. Cun var 1'000 collavuraturas e collavuratur è la BCG ina da las pli grondas patronas en il chantun. Sia attaschadad al Grischun exprima ella en moda multifara. Ultra da sias activitads economicas s'engascha ella cun ses sponsoradis, ses fond da contribuziuns e sias puschidas per lavur voluntara.

La BCG dispona da participaziuns da maioritad a la Banca privata Bellerive AG, a l'Albin Kistler AG ed a la BZ Bank Aktiengesellschaft e d'ina participaziun da minoritad a la Twelve Capital Holding AG. Il scrit da participaziun BCG è quotà a la bursa dapi il 1985.

Termins:

Quint annual 2022:

10 da favrer 2023